



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XLII No. 6  
Marso 21, 2011  
www.philippinerevolution.net

Editorial

## Kundenahon ang imperyalista nga gerang agresyon sa Libya

Isa ka gerang agresyon batuk sa pungsod Libya ang ginlunsar sang mga imperyalistang gahum. Wala sang untat ang paglapak sa pungsodnon nga kahilwayan kag kinamatarung sang pumuluyo sang Libya nga magdesisyon sa ila kaugalingon sang ginhimo sang US, France, kag Britain kag iban pang pungsod ang pagpaulan sang mga bomba sa syudad sang Benghazi sining Marso 19 sa tuyo nga pukanon ang rehimen ni Moammar Gadaffi.

Ang pagpamomba ginhimo makaligad ipagwa sang UN Security Council ang resolusyon nga dumilian ang paglupad sa kahanginan sang Libya. Ginbalay ang amo nga resolusyon sa tuyo nga sablagan ang gubyernong Gadaffi nga lutuson ang armadong pag-alsa sang pila ka rebeldeng grupo nga suportado sang US.

Gin-umpisahan ang armadong pag-alsa nga ini sadtong katung-anan sang Pebrero. Sa suporta sang US, gintuyo nga sakyan sang mga armadong rebelde nga ini ang mga demokratikong aksyong protesta kag higante nga demonstrasyon sa North Africa kag Middle East kag mangsulsol sang mga kapareho nga pagbato sa Libya.

Makaligad ang pila ka simana, napaslawan ang mga ini nga suliton sa Libya ang mga higante nga demonstrasyon sadtong Enero kag Pebrero sa Egypt kag Tunisia nga nagpukan sa mga gubyerno diri. Sang ulihi, ang pagbato sa gubyernong G a d a f f i nalimite na sa pag-alsa sang magagmay nga grupo sang


mga armadong rebelde nga nangin mahapos nga target sang kontra-opensiba sang mga pwera sang gubyerno ni Gadaffi.

Makaligad nga mapaattras ang mga armadong rebelde nga ini sa pila ka kuta sini sa Benghazi, nagdesisyon ang US kag mga imperyalistang pungsod nga direktang magpasilabot kag maglunsar sang gerang agresyon batuk sa Libya. Sa una nga hugnat sang imperyalista nga gerang agresyon, nagpaulan sang ginatos ka *missile* halin sa mga barko-de-gera nga nakaistasyon sa Mediteranean Sea kag nagpalupad sang mga *jet fighter* sa kahanginan sang Libya.

Madugay na nga gusto sang US nga pukanon ang gubyerno ni Gadaffi. Ang gubyerno nga ini isa sa pila ka gubyerno sa bug-os nga kalibutan nga nagatindog para sa pungsodnon nga kahilwayan kag nagabato sa imperyalistang polisiya sang globalisasyon nga neoliberal. Nagahiliusa ang mga imperyalista sa tuyo nga waskon ang pagginahum sang gubyernong Gadaffi. Tanan nga mga imperyalistang pungsod nagaisa kag nagasuporta sa gerang agresyon kag nag-amot sa armadong pagsalakay sa Libya.

Sa pihak nga bahin, ang paghiliusa sang mga imperyalista patimaan man sang wala sila sang pagsalig sa kada isa. Nagapauna-una ang mga imperyalistang kusog sa pagpwesto sang kaugalingon nila bilang impluwensyado nga gahum sa Libya pananglitan magmadinalag-on ang tuyo sang ila gerang agresyon nga pukanon ang gubyerno ni Gadaffi.

Ang paglunsar sang gerang agresyon sa Libya patimaan sang padayon nga nagalala nga krisis sang pangkalibutanon nga sistemang



**Mga tampok sa  
isyu nga ini...**

Operation Odyssey  
Dawn PAHINA 3

Batuan ang rehimeng  
US-Aquino PAHINA 5

Ika-100 Adlaw sg  
Kababaihan nga  
Anakpawis PAHINA 10

kapitalista. Ang tuyo nga pukanon ang gubyrno ni Gadaffi kabahin sang imperyalistang katuyuan nga paluntaron sa bilog nga kalibutan ang polisiya sang globalisasyon nga neoliberal. Maitom nga katuyuan sini nga hugakumon ang manggad nga langis sang Libya kag hatagan sang lubos nga kahilwayan ang mga monopolyo kapitalista nga mamuhunan kag kontrolon ang merkado diri.

Ginapasilabtan sang US kag iban pa nga mga imperyalistang gahum ang lain-lain nga pungsod nga nagaagi sang pangpulitika nga kinagamo sa tuyo nga tukuron sa mga pungsod nga ini ang mga papet nga gubyrno nga magapatuman sang mga polisiya pabor sa mga imperyalista.

Ang liwat nga paglunsar sang US sang gerang agresyon pat-ud nga pagabayaran sang rehimeng Obama kag sang iban pang imperyalistang gahum. Sa atubang sang nagapadayon nga mga kapaslawan kag dalagku nga kaswalti sang US sa indi matapus-tapos nga gerang agresyon sini sa Afghanistan kag Iraq, malaparan ang pagpamatuk sang mga Amerikano sa paglunsar sang gerang interbensyon sa Libya.

Ang armadong agresyon sang mga imperyalista sa Libya magapainit sang patriotismo sang pumuluyo sang Libya kag magaduso sa ila paghimakas batuk sa imperyalistang US kag pagpangapin sa ila pungsodnon nga kahilwayan.

Responsibilidad sang pumuluyong Pilipino kag tanan nga pumuluyo sang kalibutan nga suportahan ang pumuluyo sang Libya nga batuan ang armadong agresyon sang mga imperyalista kag pangapinan ang ila pungsodnon nga kahilwayan.

## Armadong agresyon sang US sa Libya halin dekada 1980

Ang Libya isa ka pungsod sa North Africa. Sa naaminhan sini amo ang Mediterranean Sea. Ara sa sidlangan sini ang Egypt, sa nabagatnan-nasidlangan ang Sudan, sa nabagatnan ang Chad kag Niger kag sa nakatundan ang Algeria kag Tunisia.




Isa ini sa 10 nga pinakadaku nga pungsod nga naga-eksport sang langis. Halin sa sakop sang Ottoman Empire, ang teritoryo nga sakop sang Libya ginsakop sang kolonyalistang Italy sang 1911. Sang malutos ang Italy sa ikaduha nga gera pangkalibutanon, nagsaylo ang Libya sa kontrol sang United Kingdom (sakop ang prubinsya sang Tripolitania kag Cyrenaica) kag France (prubinsya sang Fezzan).

Paagi sa pagpasilabot sang mga imperyalista, ginduso ang pagtingub sang mga prubinsya sini pakadto sa isa ka pungsod sang 1950. Gindeklarar sang 1951 ang pagtukod sang United Kingdom of Libya sa idalom sang papet nga hari nga Emir Idris Sanusi. Sa idalom sang pagginahom nga ini, ginhatagan sang kinamatarung nga magtukod sang mga base militar ang UK kag ang US.

Sang 1956, ginhatagan sang hari ang mga dumuluong nga kumpanya sang mga konsesyon para magkutkot sang langis sa Libya. Wala madugayi, nangin isa sa pinakadaku nga eksporter sang langis ang Libya. Bisan pa man, tanan nga ini ara sa kontrol kag benepisyong sang mga dumuluong. Nagdalom nga nagdalom ang sentimyento kag kaakig sang pumuluyo sang Libya kag nagdabok ini sang patriotikong kahublagaan.

Sang 1969, ginpangunahan ni Col. Moammar Gadaffi ang isa ka kudeta sang mga upisyal sang mil-

itar kag ginpukan si haring Idris. Sa idalom ni Gadaffi, gintukod ang isa ka gubyrno nga nagadeklarar nga “sosyalismo” kag “estado sang masa.” Ginmandu ang pagnasyunalisa sang mga bangko kag produksyon sang langis kag ginpalayas ang tanan nga dumuluong nga tropa sa ila pungsod. Gamit ang daku nga manggad halin sa produksyon sang langis, napundar ni Gadaffi ang isa ka populistang rehimen nga nagahatag sang kasiguruhan pangkatilingban sa pumuluyo sang Libya. Sa pihak nga bahin, nagluntad man ang pag-alburuto bangud sang mga

<div><p>Tuig XLII No. 6 Marso 21, 2011</p><p>Ang <i>Ang Bayan</i> ginapagwa sa lenggwahe nga Pilipino, Bisaya, Iloko, Hiligaynon, Waray kag Ingles.</p><p>Mahimo ini i-download halin sa Philippine Revolution Web Central nga makit-an sa:</p><p><a href="http://www.philippinerevolution.net">www.philippinerevolution.net</a></p><p>Nagabaton ang <i>Ang Bayan</i> sg mga kontribusyon sa porma sg mga artikulo kag balita. Ginabuyok man ang mga bumalasa nga magpaabot sg mga saway kag kag rekomendasyon sa ikauswag sg aton pahayagan. Malabot kami paagi sg email sa:</p><p><a href="mailto:angbayan@yahoo.com">angbayan@yahoo.com</a></p></div>	
<b>Kaundan</b>	
<b>Editorial:</b> Kundenahon ang imperyalistang gerang agresyon sa Libya	1
Armadong agresyon sa Libya	2
Operation Odyssey Dawn	3
Rehimeng Aquino, salot sa migrante	3
Kalamidad, nagahanot sa Japan	4
Batuan ang rehimeng Aquino kag isulong ang inaway banwa	5
<b>Mga taktikal na opensiba</b>	6
7 armas, nakumpiska sa Samar	7
9th IB, salot sa Leyte	8
Pagpasidungog kay Leonard Co	9
Nagdukot kay Jonas Burgos, tumod na	10
Lider sang imol, ginpatay	10
Adlaw sg Kababaihan nga Anakbalhas	11
RH Bill	11
<b>Balita</b>	12

Ang *Ang Bayan* ginabantala duha ka beses kada bulan sg Komite Sentral sg Partido Komunista sg Pilipinas

nakita nga pagpang-abuso sang gahum sang pila nga ara sa gubyrno.

Ang bag-o nga opensiba sang pagpasilabot sang US subong nga Marso ang pinakaulihi lang sa madamo nga tuyo nga pakunon ang gubyrnong Gadaffi sa nagligad. Sang 1982, ginpapanaog sang US ang embargo batuk sa Libya. Sang 1984, ginpadihot sang US ang tuyo nga asasinasyon kay Gadaffi. Sang 1986, gimbomba sang US ang mga syudad sang Tripoli kag Benghazi.

Sang 1992, ginpresyur sang UN ang ekonomya sang Libya kabaylo sang pagsurender sang mga Libyan nga naumid sa pagpabagsak sa isa ka eroplanong komersyal sang 1987 sa Scotland.

Gintuman ini ni Gadaffi sang 1999 kag ginsundan pa sang iban pa nga kundisyon sang UN, lakip ang pagwasak sa pila ka gamit panggera. Dalayon nga ginkuha sang UN ang mga presyur tubtub 2004. Sa mga masunod nga tuig padayon nga naghalog ang iban nga pungsod sa pagnegosyo sa Libya. **AB**

## Operation Odyssey Dawn

**G**insuguran nga bombahon sang mga eroplano panggera sang France ang Benghazi, pangaduha sa pinakadaku nga syudad sang Libya sang kaaganhon sang Marso 20. Ginsundan ini sang serye sang pagpamomba sa mga barko-de-gera kag submarino sang United Kingdom (UK) kag US sa baybayon sang Libya. Nagaabot sa 120 nga Tomahawk *missile* ang ginpalupad sang US kag UK. Gintawang nila nga Operation Odyssey Dawn ang pagpamomba nga nakatum-ok sa pagpiang sa depensa pangkahanginan sang pungsod.

Suno sa mga report halin sa Libya, madamo nga tangke, eroplano kag iban pang kagamitan militar ang nawasak sa pagpamomba. Kadungan sini, 48 sibilyan ang napatay kag 150 ang napilasan.

Pila ka libo nga pumuluyo ang gilayon nga nagkadto sa Bab al-Azizia, isa sa mga *compound* ni Gadaffi nga gimbomba sang US sang 1986 kag sa *international airport* sa Tripoli para protektahan ang mga ini.

Ang Operation Odyssey Dawn ang pinakadaku nga imperyalista nga gerang agresyon sa Middle East makaligad ang gerang agresyon sang US sa Iraq sang 2003. Wala ini sang kinatuhay sa mga gerang

agresyon sang rehimeng Bush.

Bilang sabat, nagpaandam si Gadaffi nga magalunsar ini sang “malawig nga gera” kon sa diin lutuson sang pumuluyong Libyan ang mga manugsakop. Nanawagan siya nga mag-arms ang tanan nga pumuluyo nga Libyan bilang paghanda sa pagsalakay sang mga tropang US, UK kag France sa ila pungsod.

Gintigayon ang pagpamomba makaligad nga magdesisyon ang UN Security Council nga ipatuman ang “no-fly zone” ukon pagdumili nga maglupad sa kahanginan sang Libya. Wala ginkumpormihan sang Russia, China kag Germany ang pagpresyur sa Libya. **AB**

## Rehimeng Aquino, salot sa migrante nga mamumugon

**M**abaskog nga ginkastigo sang Migrante-Middle East ang pinakaulihi nga desisyon sang rehimeng Aquino nga itugyan sa mga migrante nga apektado sang krisis sa pulitika kag kalamidad sa lain-lain nga parte ang kalibutan ang gasto sang ila byahe pauli sa Pilipinas. Gintawag nga “boluntaryo nga repatriation” ang tikang nga ini.

Siling sang Migrante, nagapakita ini sang wala sang interes ang rehimen nga siguruhon ang kaluwasan sang mga mamumugon nga Pilipino, labi na sa mga panahon sang gera, mabaskog nga kinagamo pangpulitika kag kalamidad.

Tuman ka disgustado ang mga migrante sa amo nga tikang sang rehimen. Duda sila nga ginabulsa lang sang mga upisyal sang gubyrno ang \$150,000

pondo nga gintalana sang Department of Foreign Affairs kag P200 milyon halin sa Overseas Workers Welfare Administration para sa ebakwesyon sang mga migrante sa Libya pa lang.

Sa sulod sang pila ka simana nga nagapadayon nga pag-alsa sang pumuluyo sa lain-lain nga parte sang Middle East kag North Africa, wala sang ginhimo ang rehimeng Aquino para preparahan ang pag-atras sang

mga Pilipino didto.

Sa Libya, kon sa diin nagumpisa na ang gerang agresyon sang US, nagaabot pa lang sa 8,200 sa ginatantya nga 26,000 mamumugon nga Pilipino didto, ang napauli sa pungsod. Kadam-an sa mga nakapauli gingastuhan sang ila mga amo o indi gani nag-angkas sa mga libreng sakay sa iban nga gubyrno. Ang mas madamo napilitan nga magpabilin sa sulod sang pungsod o sa kaingod nga pungsod sa pihak sang tuman na ka delikado sang ila nga sitwasyon.

Mansig-mansig ang hulag sang mga migrante kag wala sila sang koordinasyon sa embahada o anuman nga sanga sang gubyrno para lang sila makatabok sa mas luwas nga mga kaingod nga pungsod. Isa ka Pilipino na ang nabalita nga napatay sang

salakayon sang mga bandidong Libyan ang ginatrabahuan sini nga *oil rig*.

Sa Bahrain, gin-abisuhan lang sang rehimeng Aquino ang mga Pilipino nga “mangin matawhay” sa tunga sang mabaskog nga aksyon protesta didto. Nagaabot sa 32,000 Pilipino ang naipit sa nagagrabe nga sitwasyon pangpulitika didto. Wala sang ginpresentar nga plano pang-emerhensya ang embahada didto, kag wala man sila sang plano nga bakwiton ang mga mamumugon nga Pilipino.

Amo man ang sitwasyon sa Yemen. Nakapaidalom subong sa *emergency rule* ang pungsod makaligad salakayon sang mga tropa sang gubyrerno ang mga aksyon protesta sang ikaduha nga simana sang Marso. Sa pi-hak sini, wala sang anuman nga aksyon nga ginhimo ang gubyrerno ni Aquino, bisan ang pagpresentar man lang sang plano pang-emerhensya kag pagsiguro sa linya sang komunikasyon sa mga Pilipino nga naipit didto. Wala sang embahada ang Pilipinas sa Yemen.

Sa ulihi nga estadistika sang Philippine Overseas Employment Administration, nagaabot sa 2.26 milyon ang mga Pilipino nga nagatrabaho subong sa Middle East. Sang 2010, ginatantya nga nagremit sila sang \$1.47 bilyon.

Pagpauli nila sa Pilipinas, labi nga wala sang plano ang rehimeng Aquino para sal-on kag buhion sila kag ang ila mga pamilya. Sa baylo, ginapabugal pa sang DFA nga “temporaryo” lang ang mga kinagamo sa Middle East kag sa sini libre gid sila nga magbalik didto makaligad ang mga gamo kag gera.

Sa Japan, mabaskog nga ginkundenar sang mga nahalitan nga Pilipino didto ang wala sang plano kag pagkainutil sang mga upisyal sang rehimeng Aquino. Isa ka simana makaligad ang linog, 112 pa lamang ang ginatantya sa 4,000 Pilipino ang nasaylo sang embahada didto sa

# Higante nga mga kalamidad, naghanot sa Japan

**H**ugot nga nagapakig-unong ang Partido Komunista sang Pilipinas kag ang bilog nga rebolusyonaryong hublag sa pumuluyo sang Japan nga nagabatas sang nagsulunod nga daku nga kalamidad sining nagligad nga inadlaw.

Mga alas-3 sang hapon sang Marso 11, gintay-og sang isa ka pinakamabaskog nga linog ang baybayon sang naaminhan-nasidlangang Japan. Ang linog nga ini may kabaskugon nga 9 sa Richter Scale (sukatan sang kabaskog sang linog), isa sa pinakamabaskog nga pagtay-og nga nalista sa kasaysayan.

Ginsundan ang linog sang isa ka higante nga *tsunami* nga naghanot sa Sendai. Ginlunod kag ginwasak sang halos 40 piye nga mga balod ang bug-os nga komunidad malapit sa dagat. Ginatantya nga nagaabot sa 20,000 ang isip sang mga napatay. Sa Minamisanriku pa lang, isa sa mga banwa sang Sendai nga ginlunod sang *tsunami*, ginatantya nga

10,000  
na sa  
17,000  
re-si-  
dente  
sini



mas libre nga lugar. Kon wala maggahod ang mga Pilipino didto, halos wala sang bulig nga ginhatag sa ila. Ang solo nga ginhimo sang mga upisyal amo ang “pagbantay sa sitwasyon.”

Isa ka halimbawa diri ang isa ka grupo sang estudyante nga nakabase sa Sendai, isa ka lugar nga nakaagi sang mabaskog nga halit sang linog kag *tsunami*. Suno sa panaysayon sang

ang napatay.

Lakip sa nahalitan sang mabaskog nga linog kag *tsunami* ang plantang nukleyar sang Fukushima-Daichi. Nasamad ang sistema sini sang pagpalamig nga nagabot sa paglupok sang pila ka reaktor nga nagresulta sa paglapta sang mga partikulo nga *radioactive* sa kahanginan kag kapalibutan. Ang mga partikulo nga ini kapareho sang materyales nga ginalapta sang paglupok sang bomba atomika nga ginkamatay sang ginatos ka libo kag nagtuga sang grabe nga balatian pareho sang kanser.

Ginmandu na ang ebakwesyon sang bilog nga populasyon nga nagaestar malapit sa plantang nukleyar. Ang kahadlok nga maglapta ang mga partikulo nga ini kag ang kontaminasyon sang tubig kag pagkaon nagadulot sang mabaskog nga kakulba sa pumuluyo.

Ginatantya nga nagaabot sa \$38 bilyon ang kantidad sang mga naguba nga propyedad sa magkasunod nga linog, *tsunami* kag paglupok sang plantang nukleyar.

AB

nasambit nga mga estudyante, gilayon sila nga nangayo sang bulig sa embahada sang Pilipinas pagkatapos sang *tsunami*. Nag-abot ang mga upisyal sang embahada, pero wala sila sang anuman nga plano, bisan man lamang pagsaylo sa ila sa iban nga lugar. Sa baylo, ginpasa lamang sila sa mga myembro sang midya.

AB

# Batuan ang rehimeng US-Aquino kag isulong ang inaway banwa

**A**ng nagahilapit nga pagselebrar sang ika-42 anibersaryo sang pagkatukod sang Bag-ong Hangaway sang Banwa (BHB) sa Marso 29 okasyon para sa ulugon sang pumuluyong Pilipino kag sang mga rebolusyonaryong pwersa ang mga kadalag-an sang BHB sa armadong paghimakas sining nagtaliwan nga tuig. Kahigayunan man ini agud paglig-unon ang determinasyon sang mga Pulang hangaway, rebolusyonaryong pwersa kag pumuluyo nga paslawon ang maitom nga plano sang armado nga kontra-rebolusyon nga lutuson ang armadong rebolusyon kag pangmasa nga paghimakas.

Nagsayup ang rehimeng US-Aquino sa paglaum sini nga padayon lang ini nga makahari paagi sang pagpatuman sang mga polisiya kag programa nga dikta sang imperyalismong US kag mga wala-unod nga gimik samtang wala sini ginalubad ang basehang mga problema pang-ekonomya, pangkatilingban kag pangpulitika.

Ang ginapatuman sini nga mga programa hugot nga nagasanto sa polisiya sang globalisasyon nga neoliberal sang imperyalismong US. Ginadala sini sa bag-ong lebel ang programa sang denasyunalisasyon, deregulasyon, pribatisasyon kag liberalisasyon sang negosyo kag pamuhunan kag nagatuga sang labi nga kahalitan sa ekonomya kag pangabuhian sang pumuluyo. Wala ini sang maipabugal kundi ang paghatag sang limos sa idalom sang ginatawag nga Programang Pantawid Pamilyang Pilipino sa tuyo nga tabunan ang singgit sang pumuluyo para sa duta, trabaho, disente nga sweldo kag mga serbisyo sosyal.

Hugot nga ginasunod ni Aquino ang teroristang gera sang US kag ang US Counterinsurgency Guide sa ginbalay sini nga Oplan Bayanihan (OPB). Ginapadayon lang sang OPB ang brutal nga kampanyang pagpamigos sa idalom sang Oplan Bantay Laya. Agud tabunan ang padayon nga mga paglapas sa

mga tawhanong kinamatarung kag mga pasistang krimen, ginmandu ni Aquino sa Armed Forces of the Philippines (AFP) ang paggamit sang mga demagohiko nga islogan pareho sang “pag-angkon sang kalinungan” kag “pagrespeto sa tawhanong kinamatarung.”

Nagapabulag-bulag ang rehimeng US-Aquino sa nagalapnag nga kaakig sang pumuluyong Pilipino sa kapaslawan nga ipatuman ang promisa sini nga pasabton ang rehimeng Arroyo sa grabe nga kaso sang korapsyon, mga pasistang krimen kag paglapas sa tawhanong kinamatarung. Ang pagtimbuok sang presyo sang mga balaklon kag mga pagpanukot, ang mataas nga pagtibusok sang pangabuhian, kag ang paglala sang kaimulon kag kagulutmon nagagatang sa nagabalingaso nga kaakig sang pumuluyo kag paghandum nila nga maagum ang sandigan nga pagbag-o sa ila kahimtangan.

Nagagrabang ang ginabatas nga krisis sang nagaharing sistema pangpulitika. Masami nga ginatay-og sini ang pagdumalahan sang rehimeng Aquino. Wala-tuo ang paglupok sang mga bangga kag kontradiksyon sang mga magkaribal nga paksyon sang nagaharing sahi. Sa pihak nga bahin, ang nagatipon nga kaakig sang pumuluyo nagalupok-lupok sa wala-

tuo nga mga aksyon protesta. Indi magdugay magakadto ang mga ini sa mas daku pa nga paghulag sang masa sa atubang sang ginapakita ni Aquino nga wala sang pagbatyag sa interes kag kaayuhan nila.

Madasig nga nabuyagyag ang korapsyon kag kapintas sang rehimeng Aquino kag ang kontra-pumuluyo, anti-nasyunal kag anti-demokratikong kinaiya sini. Ang masingki nga krisis nagatulod sa pumuluyo nga magbato.

Padayon nga nagabaskog kag nagalapad ang rebolusyonaryo nga kahublagang masa. Sa atubang sang sitwasyon nga ini, mahimo nga tukuron sang mga rebolusyonaryong pwersa ang isa ka malapad nga nagahiliugyong prente kag bun-agon ang isa ka mabaskog nga kahublagang masa nga sarang maghamulag kag magpuhan sa rehimeng Aquino sa relatibo malip-ot nga panahon.

Ang padayon nga paglubha sang krisis sang nagaharing sistema nagatuga sang paborableng kundisyon para sa pagpasulong sang armadong rebolusyon kag mga pangmasang panghimakas. Ara sa pusisyon sang BHB nga mag-angkon sang daku nga pagsulong. Kada isa ka yunit sang BHB dapat may patud nga panahon para sa hilikuton pangkombat kag mga paghanas pulitiko-militar. Mahimo ini kadungan sang pagpabaskog sang mga lokal nga sanga sang Partido kag mga organisasyong masa sa kaumhan kag pagpasulong sang rebolusyong agraryo sa nagapalapad nga sakop.

Ang panahon sang paghari sang rehimeng Aquino panahon sang daku nga pagpasulong sang inaway banwa. Sandig sa panawagan sang PKP, nagatum-ok ang BHB kag tanan nga rebolusyonaryong pwersa sa pagpatuman sang mga rekisito para isulong ang inaway banwa sa halintang sang estratehikong pagkapatas. **AB**



# Mga taktikal nga opensiba batuk sa Oplan Bayanihan

Indi magnubo sa 11 elemento sang AFP ang napatay kag 19 ang napilasan sa mga aksyon militar sang Bag-ong Hangaway sang Banwa (BHB) sa lain-lain nga rehiyon halin Pebrero tubtob Marso. Talalupangdon sa mga aksyon militar nga ini ang pagsilot sa mga buyong nga tropa nga nagaserbi nga protektor sang mapanghalit nga mga kumpanya sa pagmina kag agribisnes.

**Sa Southern Mindanao.** Ginsilutan sang Armando Duman-dan Command sang BHB sa Compostela Valley ang mga tropa sang 10th ID sa duha ka aksyon militar sining Marso 11 kag 13. Indi magnubo sa lima ka suldado ang napatay, lakip ang isa ka *company commander*, kag 12 ang napilasan. Ang mga suldado nagalunsar sang kombatan nga operasyon gamit ang karatula nga Peace and Development Operations sa idalom sang Oplan Bayanihan.

Daku nga kaswalti ang natuga sang BHB sang ala-una sang hapon sang Marso 11 sang palukpan sang *command-detonated landmine* ang isa ka 40-katawo nga kolum sang kaaway sa Sityo Tan-awan, Baryo Malinawon, Mawab, Compostela Valley. Ang lugar sakop sang perimetro sang bag-ong saylo nga hedkwarters sang 10th ID.

Lakip sa napatay si 1Lt. Godofredo Despojo Jr.

Baliskad sa mga pahayag sang AFP, wala sang kaswalti sa kubay sang BHB.

Bangud sa natabo ang aksyon militar sang BHB sa tuman kalapit lang sa hedkwarters sang 10th ID, ginsiling ni Lt. Col. Lyndon Paniza, kumander kag tagapamaba sang 72nd IB, nga isa lang ang ila kaswalti. Pero duha ka siksabay ang ginpadala sang kaaway sa Sityo Mahayahay, Baryo Tuburan sa banwa man sang Mawab para

kuhaon ang mga bangkay kag pilason.

Duha ka adlaw makaligad ini, isa ka sarhento ang napatay sa isnayping sang BHB sa mga tropa sang 3rd Special Forces sa sentro sang Baryo Latiban, New Corella, Davao del Norte.

Samtang, sang Pebrero 25 ginsilutan sang mga partisano sang Magtanggol Roque Command sang BHB ang isa ka *combat intelligence asset* sang 39th IB. Si Roldan Quitua, 24, nga ginsilutan sa Sta. Cruz, Davao del Sur, ginauyatan ni Lieutenant Villegas sang 39th IB.

Ginpasulod siya sa BHB sadtong ulihi nga bahin sang 2008 sang iya *handler* agud maniktik. Sang mahibal-on ang tunay niya nga pagkatawo gilayon siya nga naghalin. Ginsugid niya sa militar ang ginahamtangan kag kusog sang BHB, kag nagresulta ini sa duha ka depensiba nga inaway, nga napangibabawan sang Pulang hangaway bangud sa napanahon nga pagpaabot sang impormasyon sang masa.

Kada operasyon sang 39th IB akti-

bo si Quitua sa pagpamahog kag pagpangharas sa mga tagabaryo, labi na yadtong nagapamatuk sa Barangay Defense System.


**Sa Far South Mindanao.** Indi magnubo sa anom nga kaswalti ang gintuga sang milisya sang pumuluyo kag mga Pulang hangaway sang Mt. Alip Operations Command sa mga tropa sang AFP sa Davao del Sur kag Columbio, Sultan Kudarat.

Sang Marso 2, indi magnubo sa apat ka suldado ang naigo sang isnayping sang BHB sa mga nagaoperasyon nga tropa sang 27th IB sa Baryo Tagaytay, Magsaysay, Davao del Sur. Makaligad ang isa ka simana, duha pa ka kaswalti ang gintuga sang BHB sa isnayping sa mga nagapanghalit nga tropa sang 39th IB sa Baryo Colonsabak, Matanao, Davao del Sur.

Ang mga gintarget nga tropa ang nagagwardya sa mapanghalit nga higante nga minahan Xstrata-SMI.

**Sa North Central Mindanao.** Ginguba sang Rexan Perez Command sang BHB ang *heavy equipment* sang Dole Philippines kag Sumifru sa Malaybalay, Bukidnon sang Pebrero 26 kag 28. Ang aksyon pagsilot gintigayon bangud sa pagpang-agaw sang mga kumpanya nga ini sa duta sang mga mangunguma, pagpanghimulos nila sa mga mamumugon kag pagguba sa naturalisa.

Sadto man nga Pebrero 23, isa ka elemento sang CAFGU ang napatay kag isa pa ang napilasan sa operasyong harasment nga ginlunsar sang Ernesto "Boyboy" Roa Command sang BHB, mga alas-7 sang gab-i sa Baryo Dao, San Fernando, Bukidnon batuk sa mga nagaoperasyon nga tropa sang 8th IB. Ang 8th IB ang protektor sang Ea-





gle Mining Co., nga labaw nga ginakaugtan sang mga Lumad sa lugar bangud sa pagguba sini sa mga kabukiran, sapa kag ginakuhaan sang tubig.

Samtang, mabaskog nga ginpangin-wala sang BHB sa Negros nga imbolbado ang mga hangaway sini sa isa ka *misencounter* sang Enero 28 sa Cambayobo, Calatrava, Negros Occidental. Ang matuod, siling ni Ka Cecille Estrella, tagapamaba sang RPC, mga tropa sang AFP amo ang imbolbado sa nasambit nga *misencounter*, nga ginkamatay sang indi magnubo sang 15 suldado.

Antes ang *misencounter*, gin-ambus sang mga Pulang hangaway ang isa ka grupo sang mga nagasalakay nga suldado. Lima ka suldado ang napatay sa una nga hugnat sang lukpanay. Isa ka Pulang hangaway naman ang namar-tir sa inaway nga ini.

Madasig nga nakaatras ang BHB halin sa lugar nga ginawayan kag wala na sila naabtan sang mga ginpadala nga reimporsment sang kaaway. Bangud sa ila sobra-sobra nga kahadlok nga maambusan sang BHB, mga elemento mismo sang AFP, Division Reconnaissance Company kag PNP ang naglukpanay. AB

## 7 armas, nakumpiska sang BHB sa ambus sa Eastern Samar

**G**in-ambus sang mga Pulang hangaway sang Bag-ong Hangaway sang Banwa-Eastern Samar (Sergio Lobina Command) ang nagapatrulya nga mga elemento sang 3rd Manuever Platoon-Regional Mobile Group-PNP nga sakay sa mga motorsiklo sa Baryo Tangbo, Arteché sang Pebrero 26, mga alas-onse sa aga.

Gilayon nga napatay si Police Inspector Al Llanza Tantiado kag grabe nga napilasan ang tatlo pa makaligad palukpan sang bomba kag paulanan sila nga mga bala sang mga Pulang hangaway. Nakaluwas sa ambus si PO1 Portajada kag gilayon niya nga ginsurender ang iya armas. Hilway siya nga ginpauli. Nakumpiska sa inaway ang tatlo ka ripleng M16, isa ka M14, duha kalibre .45 kag isa ka pistola nga .9 mm, mga bala kag iban pa nga gamit militar.

Ang nagapatrulya nga mga elemento sang PNP nagapauli sa ila hedkwarters sa banwa sang Arteché halin sa baryo sang Catumsan. Ang PNP-RMG aktibo nga katuwang sang AFP sa paglunsar sang *combat and clearing operations* sa daku nga bahin sang Northern kag Eastern Samar sa idalom sang Oplan Bayanihan sang subong nga rehimen.

Ginapamatud-an sa mga nakumpiska nga datos halin sa mga elemento sang PNP-RMG ang aktibo nila nga papel sa

pagtukod sang mga *monitoring-intelligence units/assets, checkpoints, quick reaction force* kag iban pa nga kaparehong tipo bilang hugot nga katuwang sang AFP sa *counterinsurgency operations*.

Ang nasambit nga ambus sabat sa panawagan sang rehion nga pasingkion kag pataason ang lebel sang pagpakig-away gerilya kag paslawon ang Oplan Bayanihan sang subong nga rehimen. Sabat man ini sa madugay na nga demanda nga hustisya sang pumuluyo sang Eastern Samar sa madamo nga kaso sang paglapas sa tawhanong kinamatarung sang AFP kag PNP-RMG.

Labaw sa tanan, ginpamatud-an sang madinalag-on nga taktikal nga opensiba nga sa tunga sang maikit nga operasyon sang kaaway sa mga lindero sang Northern kag Eastern Samar, nangin madinalag-on ang ambus bangud sa mainit nga suporta kag pagsakdag sang pumuluyo sa Eastern Samar sa BHB. AB

## EDC, ginpaandaman sang BHB-Nueva Ecija

**G**inpaandaman sang Provincial Operational Command sang Bag-ong Hangaway sang Banwa sa Nueva Ecija ang Energy Development Corporation (EDC) batuk sa plantasyon sini sa prubinsya. Sa isa ka sulat kay Paul Aquino, *chief executive officer* sang EDC kag tiyo ni Benigno

Aquino III, ginsiling sang BHB sa Nueva Ecija nga untaton sang EDC ang proyekto sini sa Sityo Maluyon, Baryo Villarica sa Pantabangan.

Siling sang BHB, ang plantasyon ang EDC nagasakop sa bilog nga komunidad sang minorya kag setler “hayagan nga

porma sang paglapak sa kinamatarung sang mga mangunguma sa duta kag pagdingot sa ila sang patas nga benepisyo sa dunang-manggad.”

Kahimbon ang reaksyunaryong gubyerno paagi sa National Irrigation Administration, nauna na nga ginpaguba sang EDC ang mga balay sang pumuluyo sa lugar kag gindumilian pati ang mga payag nga ginapasilungan nila. Pwersahan sila nga gintipon sa isa ka gamay



nga *relocation site* nga tuman kalayo sa ila mga ginatalauma nga wala man sang garantiya nga indi liwat sila mapalayas. Ginpaandaman sila kag ginapahog nga pagapasakaan sang kon ano nga mga kaso bangud sa ila pagpamatuk. Baraghal man nga gindeklarar sang EDC nga pati ang mga talamnan kag iban pang napauswag nga pusisyon sang mga mangunguma pagasakupon man sang kumpanya. Instrumento sang EDC kag NIA sa pagpang-ipit ang 81st IB.

Subong plano nga angkunon sang EDC ang panibag-ong 100 ektaryas nga kadutaan halin sa nauna nga 50 ektaryas nga natamnan na sang mga bungang kahoy sa komersyal kag pribadong benepisyo.

Katuwang ang militar, madugay na nga ginaipit sang NIA ang mga residente sa lugar. Sang 2006 ginpatay sang mga berdugo sang 48th IB si Rev. Pastor Andy Pawican, ang nagatindog nga lider sang mga mangunguma batuk sa pagpang-ipit kag pagpalayas sang NIA.

Gindugang sang BHB nga luwas sa pagdingot sa pumuluyo sang kinamatarung sa duta labi pa nga ginaabuso sang EDC kag ginahimuslan ang mga mamumugon nga gintipon sini sa idalom sang Maluyon Indigenous Christian Farmers Association. Tuman kalayo sa takda nga minimum nga inadlaw nga sweldo ang ginahatag sang EDC sa mga mamumugon kag kon kis-a ginaobligar sila nga magtrabaho nga wala sang bayad.

Sa gahum sang awtoridad sang Demokratikong Gubyerno sang Pumuluyo ginamanduan sang BHB ang EDC nga ihatag sa mga mamumugon ang nagakai-go nila nga sweldo. Pagakwentahon ini halin sa una nga adlaw nga nagsugod ini sa pagtrabaho sa lugar.

Ginaabisuhan sang BHB ang EDC nga magpaabot sang apela paagi sa sugilanon pangkalinungan kon nakahanda ini nga magsunod sa mga pagsulundan kag regulasyon sang Demokratikong Gubyerno sang Pumuluyo. Lakip sa ila mga obligasyon ang pagsiguro pangunahon sang interes sang pumuluyo, pagamlig sa kapalibutan kag pungsodnon nga patrimonya, kumpensasyon sa mga atrasar kag kahalitan, amo man ang demokratikong konsultasyon kag pagpa-hanugot sang mga komunidad nga gilayon kag direkta nga maapektuhan sang operasyon sang EDC.

AB

## 19th IB: Berdugo sang Leyte

Ginbuyagyag sang Mt. Amandewin Command ang bug-os nga konteksto sang pagpatay sang 19th IB kanday Leonard Co, isa ka bantog nga Pilipino nga *botanist*, kag iban pa niya nga kaupdanan samtang nagapanalawsaw sa kagulangan sang Kananga, Leyte sang Nobyembre 15, 2010. Sa mas o menos 15 minutos nga pagpaulan sang bala sang 19th IB, napatay sanday Co, isa ka *forest guard* kag isa ka mangunguma nga nagabulig sa iya pagpanalawsaw.

Para makapanghugas-kamot sa ila krimen, ginsiling sang 19th IB nga sanday Co kag duha pa nga biktima sang kapintas militar napatay sa pagbayluhanay sang lupok sang mga suldado sa BHB kag ang mga bala nga nag-igo sa ila naghalin kuno sa Bag-ong Hangaway sang Banwa (BHB).

Ginpangin-wala ini sang duha ka nakaluwas sa "Kananga Masaker." Siling nila, wala sila sang nakita nga iban nga tawo sa lugar maluwas sa militar. Ang ila mga kasangkapan para sa pagpanalawsaw nasal-an nga malaba nga armas ukon awtomatikong riple nga nangin rason para paulanan sila sang bala sang mga suldado nga utok-pulbura.

Gindampigan sang isa ka *task force* sang Department of Justice ang pagbinutig sang militar. Pero wala ini ginbaton sang pamilya, kaabyanan kag kakilala sang siyentista. Nagpasaka ang pamilya Co sang kaso nga murder batuk sa platun sang militar nga naumid sa masaker, lakip ang ila kumander kag pangaduha nga kumander. Sa kaso kriminal nga ginpasaka sang balo ni Leonard Co nga si Glenda, kag mga ginikanan nga si Lian Sing Co kag Emelina Co, gintu-

mod nila ang pila sa 38 upisyal kag tinawo nga imbolbado sa Kananga Masaker nga sanday 1Lt. Ronald Odchimar, 2Lt. Cameron Perez, Cpl. Roger Mores, Pfc. Albert Belmonte, Pfc. Gil Guimerey, Pfc. Alex Apostol, Pfc. William Bulic kag 28 iban pa.

Sining Pebrero, nagpagwa sang pahayag ang Mt. Amandewin Command (BHB-Leyte) bahin sa masaker. Siling sini, nagakatol na ang mga tudlo sang mga elemento sang 19th IB nga magpisga sang gatiyo bangud sa isa kag tunga ka bulan antes ang masaker gin-ambus sang Mt. Amandewin Command ang nagaoperasyon sa Baryo Salvacion sa kaingod nga banwa sang Albuerra. Pito ka suldado ang napatay sa mga engkwentro nga ini. Gani nga sang makita sang 19th IB ang grupo nanday Co sa kagulangan sang Kananga gilayon nila nga ginpalukpan nga wala sang pagpat-ud kon sin-o ang ila ginatarget.

Sa pihak sang mabaskog nga pagkastigo sa masaker sa Kananga, wala mag-untat ang 19th IB sa pagpanghalit sa mga sibilyan sa mga banwa sang Kananga, Carigara, Capoocan, Ormoc, Albuera, Baybay, Burauen kag Jaro,





tanang sa Leyte. Ginsakop sang ila mga operasyon bisan nagluntad ang untat-lupok sang Disyembre. Sang Disyembre 14, gin-ambus sila sang BHB sa katung-anan sang Baryo Tigbaw kag Baryo Candigahob sa Carigara, kon sa diin 10 ka suldado ang napatay kag 5 ang napilasan. Pareho sang natabo sa nauna nga ambus, ginatago sang 19th IB sa midya ang kadakuon sang ila mga kaswalti.

Ginbuyok sang Mt. Amandewin Command ang lain-lain nga sektor nga suportahan ang paghimakas para sa katarungan sang mga biktima sang paglapas sang 19th IB sa tawhanong kinamatarung. Siling sini, dapat matakpos na ang panahon sang wala untat nga paglapas sang 19th IB sa tawhanong kinamatarung. Dapat imbestigahan ang tanan nga paglapas sini sa International Humanitarian Law, kag dapat bungkagon ang batalyon bangud sa lapnagon nga paglapas sini sa mga pagsulundan sang gera. **AB**

### “Sierra Madre Trek”

## Isa ka pasidungog kay Leonard Co

**P**agalakbayon sang mga paryente, kaabyanan kag mga tagapangapin sa naturalisa ang kabukiran sang Sierra Madre bilang pagpasidungog sa makabanwa nga siyentista nga si Leonard Co. Ang paglakbay gin-organisa ni Darwin Flores, bayaw sang napatay nga syentista.

May duha ka bahin ang “Sierra Madre Trek:” 1) Reconnaissance Trek halin Marso 23 tubtub Abril 11— nga pagasakupan sang mga katapu sang University of the Philippines-Baguio Mountaineers; 2) Paglakbay sang isa ka 30-katawo nga grupo halin Abril 18-23. Ginalauman nga madamo nga mga *mountaineer* kag mga maki-naturalisa ang magapasakop diri. Magatapos ang “Sierra Madre Trek” sa pagsabwag sang mga abo ni Co sa 16-ektaryas nga Forest Dynamics Plot sa Baryo Villarobles, sa Palanan, Isabela kon sa diin madugay siya nga nagtenner bangud sa iya pagpanalawsaw bahin sa mga tanom nga herbal. **AB**

## Lider nga imol, ginpatay

**I**sa ka lider sang imol ang ginpatay sa syudad sang Navotas sang ginapatihan mga armadong ahente sang estado. Si Antonio “Nono” Homo, 47, *campaign officer* sang Nagkakaisang Samahan sa Kadiwa, isa ka lokal nga tsapter sang Kalipunan ng Damayang Mahihirap (KADAMAY) sa Navotas. Residente siya sang San Roque Village sa Kadiwa, Navotas City.

Mga alas-8:40 sang gab-i sang Marso 16 nang malapitan nga gintiro sa ulo si Homo, gamit ang isa ka .45 pistola.

Mabaskog nga ginkundenar sang KADAMAY ang ginpatay kay Homo. Suno sa KADAMAY, isa si Homo sa mga nagapamuno sa mga paghulag batuk sa demolisyon sa lugar. Sa kamatuoran, lakip siya sa mga nagpasaka sang kaso sa meyor sang Navotas nga si John Ray Tiangco kag City Engineering Office sang syudad angut sa iligal nga demolisyon nga nag-umpisa pa sang Marso 3.

Nagpanawagan ang KADAMAY nga padayon nga depensahan sang mga imol ang ila trabaho, pangabuhian kag mga puluy-an. **AB**

## Upisyal militar, imbolbado sa pagdukot kay Jonas Burgos

**G**inapasabat sang Commission on Human Rights (CHR) ang isa ka upisyal sang AFP sa pagdukot sa aktibista nga si Jonas Burgos. Si Burgos gindukot sa isa ka kalanan sa Ever Gotesco Mall sa Commonwealth Avenue, Quezon City sang Abril 2007. Sa ginhimo sadto nga imbestigasyon, nahibal-an nga ang plaka sang isa sa mga salakyan ara sa pag-amlig sang 56th IB.

Suno kay Deputy Commissioner Jose Manuel Mamaug sang CHR, ginkilala sang isa ka testigo si 1Lt. Harry Baliaga Jr. bilang isa sa mga armadong tawo nga nagdukot kay Burgos. Si Baliaga nakadestino sadtong panahon sa 56th IB. Ang yunit militar nga ini nakapaidalom sa 7th Infantry Division nga papamunuan sadto sang berdugo nga si Gen. Jovito Palparan.

Daku nga bulig sa imbestigasyon sang CHR ang testimonya ni Jeffrey Cabintoy nga nagatrabaho diri sa restawran kon sa diin gindukot si Burgos, kag ni Edmond Dag-uman, isa ka anay suldado nga nagserbi sa idalom ni Baliaga sa 56th IB. Ginarekomendar sang CHR sa Korte Suprema nga hatagan sang *writ of amparo* si Gng. Edita Burgos, iloy sang biktima kag ginmandu kay Baliaga nga ituhaw si Burgos.

Kaparte man sang rekomendasyon ang pagpasaka sang kaso nga *kidnapping/enforced disappearance/arbitrary detention* kay Baliaga bilang isa sa mga mayor nga akusado bangud sa ila direktang partisipasyon sa pagdukot kay Burgos. **AB**



Sa ika-100 Internasyunal nga Adlaw  
sang Kababaihan nga Anakbalhas

## Pagkainutil sang rehimeng US-Aquino, ginkastigo

**L**inibo nga kababaihan nga Pilipino ang nakig-isa sa pagselebrar sang ika-100 nga Pangkalibutanon nga Adlaw sang Kababaihan nga Anakbalhas sang Marso 8. Bilang pagdumdom sa adlaw nga ini, nagmartsa ang kababaihan sa atubang sang Malacanang kag lain-lain nga sentrong banwa para iduso ang ila kinamatarung para sa serbisyo sa ikaayong lawas kag batuk sa nagati-naas nga presyo sang mga serbisyo kag balaklunon.

Sa pagpanguna sang GABRIELA kag mga progresibong organisasyon, ginhalimbawa nila ang una nga siyam ka bulan sang bag-ong pungko nga rehimeng Aquino sa pagbusong sang kainutilan. Sa ila pahayag, ginbun-ag sa adlaw nga ini ang ila disgusto batuk sa maki-dumulong kag kontrapumuluyo nga bag-ong rehimen.

Lakip sa mga ginkastigo sang GABRIELA ang mga programa sang rehimeng Aquino pareho

sang Public-Private Partnership (PPP) nga wala sang iban kundi pagsunod sa iskema sang pribatisasyon kag denasyunalisasyon sang imperyalismong US. Ginpakamalaut man nila ang Conditional Cash Transfer (CCT) nga wala sang matuod nga makabenepisyo maluwas sa mga upisyal sang gubyrno nga nagakurakot sa pondo sini. Nanawagan man sila nga ipasar ang Comprehensive Reproductive Health Bill nga ginapasaka sang Gabriela

Women's Party sa Kongreso.

Nagkig-isa ang mga raliyista sa kababaihan sa bug-os nga kalibutan, labi na sa mga pung-sod nga ginabayo sang mabaskog nga krisis sa pulitika. Gindumdom ang adlaw nga ini samtang minilyon nga kababaihan ang nagahulag, upod ang ila mga pumuluyo, sa mga protesta kag pag-alsa nga ginabunga sang malaut kag mapanghalit nga epekto sang pangkalibutanon nga resesyon. Hungod nga nagasanto ang pagdumdom sa adlaw nga ini labi pa ang pangkalibutanon nga adlaw sang kababaihan pagpasidungog sa mga aksyon protesta sang kababaihan batuk sa malain nga epekto sang kapitalismo.

May mga kapareho nga paghulag sa Southern Tagalog, Central Luzon, Bicol, Cordillera, Negros, Iloilo, Cebu, Bohol, Southern Mindanao, Caraga, Northern Mindanao, kag sa Socksargen. **AB**

## RH Bill: Para sa ikaayong lawas sang kababaihan

**B**oto para sa ikaayong lawas sang kababaihan, indi sa pagkontrol sang populasyon. Ini ang sabat sang Gabriela Women's Party (GWP) sa kritisismo kag maitom nga propaganda sang Simbahan Katoliko kag iban pa nga konserbatibong sektor sa ginpasaka sini nga Comprehensive Reproductive Health (RH) Bill sa Kongreso.

Suno sa GWP, indi lang paghatag sa kababaihan sang nakapokus ang hagna sa kinamatarung nga magpili sang pamaagi para malikawan

ang indi planado nga pagbusong, kundi sa kinamatarung nila sa mga serbisyo sa ikaayong lawas sa kabilugan. Wala ginadingot sang GWP nga kabilang sa hagna ang *birth control*, pero ini isa lang sa malaba nga listahan sang mga tikang nga dapat pat-uron sang estado para maamligan ang ikaayong lawas sang kababaihan.

Dugang sang GWP, isa ka babaye ang nagakapatay kada duha ka oras dala sang mga kumplikas-


yon sa pagbata. Dugang pa diri, nagaabot sa 11 babaye ang nagakamatay sa lain-lain nga rason. Ang makaluluoy nga kahimtangan sang kababaihan, labi na sang kababaihan nga anakbalhas, ang pangunahon nga rason para iduso sang GWP ang RH Bill.

Ang masunod amo ang pila lang sa kumprehensibong probisyon sang hagna nga RH Bill:

> pagpat-ud nga may nagakaigo nga numero sang mga ginhanas nga komadrona sa mga komunidad

> nagakaigo nga pasilidad sa mga pangpubliko nga ospital sa kada syudad kag prubinsya para sa anuman nga kinahanglanon sang mga nagabata (*obstetric care*) kag ila mga lapsag

> nagakaigo nga pasilidad kag malapnagon nga edukasyon bahin sa lain-lain nga pamaagi sa pagplano sang pamilya kag



*"RH Bill..." sundan sa pahina 11*

## Mga residente sang North Triangle, liwat nagbarikada

MADINALAG-ON ang pagpaslaw sang mga residente sang Sityo San Roque sa Barangay North Triangle sa Quezon City sa liwat nga pagtuyo nga demolisyon sa ila lugar.

Sang Marso 15, liwat nga nagbarikada ang mga residente sa palibot sang komunidad pagkatapos ginmandu ni Mayor Herbert Bautista sang Quezon City sa House Committee on Urban Planning and Development nga ipatuman ang demolisyon sang mga balay sa lugar. Ginpagwa ang mandu sang Marso 9 pa.

Kaagahon pa lang sang Marso 15, nagtukod na sang barikada ang mga residente. Temporaryo nga ginabangan sang mga pamatan-on ang kahabaan sang Epifanio De los Santos Avenue (EDSA) malapit sa North Avenue. Nag-abot ang alas-12 sang udto pero wala sang nag-abot nga *demolition team* gani nahibal-an sang mga residente nga nagmadinalag-on ang ila nga paghulag.

Madumduman nga sang Setyembre 2010, gintinguhaan nga waskon ang mga balay sa komunidad para hatagan-dalan ang pagtukod sang Quezon City Central Business District (QC-CBD). Napunggan lang ini bangud sa militansya kag masingki nga pagbato sang mga residente.

Ginatantya nga nagaabot sa 25,000 ka pamilya ang maapektuhan sang plano nga QC-CBD sa bilog nga North Triangle kag iban pa nga sakop nga lugar.

## Protesta sa langis, ginlunsar

NAGLUNSAR sang aksyon protesta ang mga pamatan-on kag estudyante para pakamalauton ang sunud-sunod nga pagsaka sang presyo sang langis. Ginpamunuan sang Anakbayan kag League of Filipino Students (LFS) ang protesta sa tatlo ka daku nga kumpanya sang langis sa Makati City. Suno sa Anakbayan, siyam ka beses na nga nagsaka ang presyo sang krudo (katumbas sang P7.35 kada litro) samtang siyam ka beses man nagsaka ang presyo sang gasolina (katumbas sang P6.50 kada litro). Ginsiling man nila nga halos triple ang ginsaka sang presyo sang langis halin sang 2001. Halin sa P13.82 kada litro sang 2001 nagtimbuok na ini sa P46.05 kada litro subong nga tuig.

Una nila nga ginkadtuan ang upisina sang Petron kag ginbuksan ang pwertahan sini. Ginsiling sang LFS nga suno sa pagtuon *overpriced* sang P7.00 ang presyo sang lokal nga mga produktong petrolyo. Masunod nila nga ginkadtuan ang upisina sang Pilipinas Shell kon sa diin mapintas nga ginbungkag ang ila kubay sang mga elemento sang Makati Police kag gwardya sang kumpanya. Katapusan nila nga ginkadtuan ang upisina sang Chevron kon sa diin ginpugpog nila ang tarangkahan sang kumpanya. Suno pa sa LFS, kontrolado gid sang mga dumuluong nga kapitalista ang kabuhi sang Pilipino. Pamatuod diri ang pagdikta sang mga ini sa presyo sang langis.

Samtang, ginhangkat man ni Anakpawis Rep. Rafael "Ka Paeng" Mariano ang gubyerno nga hatagan-atensyon ang hagna nga layi nga ginpasaka sang Anakpawis nga nagabatura sa Oil Deregulation Law (House Bill 4317). Suno kay Mariano, sa halos isa ka dekada nga implementasyon sang deregulasyon, solo mga dumuluong nga kartel sang langis ang nakabenepisyo sa layi nga ini. Ginpas-an sang pumuluyo indi lang ang presyo sang langis kundi ang epekto sang mga ini sa presyo sang mga pangunahon nga balaklon. Siling nila, dapat na nga umpisahan ang pagdiskas sang Kongreso ang HB 4317 kag magplastar sang alternatibo nga solusyon sa polisiya bahin sa langis, dugang pa ni Mariano.

Nakatalana ang daku nga paghulag sang lain-lain nga sektor sa maabot nga Marso 31 batuk sa Oil Price Hike. Nagpatilaw man sang untat-byahe sa pila ka bahin sang Bicol ang mga drayber kag opereytor sang Marso 16.

### "RH Bill..." halin sa pahina 10

paghatag sang espesyal nga atensyon sa imol nga pamilya kag mag-asawa nga wala sa nagakaigo nga resorsa para sa anuman nga serbisyo sa ikaayong lawas.

> nagakaigo nga pasilidad kag gamit kag paghatag sang espesyal nga resorsa para sa mga bag-ong bata kag ila mga lapsag sa panahon sang mga kalamidad kag iban pa nga aksidente.

> paghatag sang Philhealth sang maksimum nga benepisyo para sa grabe nga kaso nga may angut sa *reproductive health* pareho sang HIV kag AIDS, *breast* kag *reproductive tract cancer*, kump-

likasyon sa pagmenopus kag iban pa

> pag-abot sa kababaihan sa mga komunidad sa malayo nga lugar nga indi na malab-ot sang lokal nga serbisyo sa ikaayong lawas

> paglakip sang edukasyon bahin sa reproduksyon kag sekswalidad sa mga kurikulum sang mga eskwelahan, halin ika-5 grado tubtob sa ika-4 nga tuig sang hayskul

> pag-obligar sa mga pribadong kumpanya nga respetuhon ang kinamatarung sang mga mamumugon sa halambalanon nga ini

> libre nga serbisyo sa ikaayong lawas kag mga produkto para sa pinakaimol nga pamilya. **AB**

**Bidyo sang tortyur sa mga rekrut nga suldado, nagalapnag**

GINBUYAGYAG sang *Isnayp*, grupo sang multimidya sang rebolusyonaryong hublag sa Bicol, ang isa ka bidyo nga nagapakita sang paggamit sang tortyur sa paghanas nga ginatigayon sang AFP sa mga rekrut sini nga suldado. Ang 8 1/2 minutos nga ginbutang sang *Isnayp* sa *Youtube* sang Marso 17 kag nagalibod subong sa *Facebook*.

Suno sa *Isnayp*, ang bidyo ginhatag sa ila sang pila ka disgustado nga suldado sang 9th ID sang Philippine Army nga nakabase sa Kuta Elias Angeles, Camarines Sur. Ang 9th ID ang nagapamuno sa *counterinsurgency operations* sa rehiyon sang Bicol. Ginaako sang 9th ID nga ang bidyo ginkuha sa paghanas sang ila Training Unit.

Samtang, nagapanawagan ang Bagong Alyansang Makabayan sang imbestigasyon sa pagmaltrato kag paggamit sang tortyur sang AFP sa mga ginahanas nga rekrut nga suldado.

**Iligal nga detensyon sa CV**

ILIGAL nga ginaresto kag ginkulong sang mga tropa kag upisyal sang Central Command sang AFP (CENTCOM) ang lima ka myembro sang Karapatan-Central Visayas sang Marso 19. Pilit man nga ginkuha ang isa nila nga kaupod nga pilason.

Suno sa Karapatan, nakaengkwentro sang mga suldado sang 79th IB ang ginadudahan nila nga mga Pulang hangaway sang Marso 16 sa Sta. Catalina, Negros Oriental. Pagkaaga, nagtukod sang tsekpoynt ang mga suldado. Sang Marso 19 ginkumpronta sang militar ang lima ka boluntir nga nag-agi sa tsekpoynt sa Baryo Mag-anod, Santa Catalina. Sila amo sanday Christopher Sollano, Althea Sollano, Welchester Paglinawan, Manuel Batilla kag Erwin Sinangote, tanan taga-Cebu city. Upod nila sadto ang pilason nga si Marvin Villegas nga taga-Cebu City man.

Suno sa mga saksi, hinali kuno nga nag-abot ang isa ka puti nga *van* kag pilit ginsakay diri si Villegas para dalhon kuno sa isa ka ospital nga wala ginhingalanan. Wala pa gihapon ginapakita sang militar ang lima nga gindakop.

**Batuk sa pagmina sa Northeast Cagayan**

MASOBRA 4,000 pumuluyo, kadam-an mga mangunguma, ang nagpartisipar sa isa ka pinakadaku nga demonstrasyon nga ginlunsar sa Gonzaga kag Sta. Teresita, Cagayan sang Marso 19. Suno sa pahayag sang National Democratic Front-Cagayan Valley, ginpakamalaut sang mga demonstrador ang pagpandambong sang mga kumpanya sa pagmina nga Lianxing kag Huaxia halin sa Taiwan.

Lakip sa mga nagpartisipar sa aksyon protesta ang mga mangunguma halin sa mga barangay sang Cabambanan Norte, Cabambanan Sur, Maguing, Isca, Flourishing, Progressive, Smart, Paradise, Batangan, Calayan, Minanga, Callao, Tapel, Rebeca, Baua, Sta. Cruz, San Jose, Cabiraoan kag Pateng sa banwa sang Gonzaga; kag Barangay Mision kag Dungeg sa banwa sang Sta. Teresita.

Antes ini, masobra 2,000 pumuluyo ang nagpartisipar sa isa ka rali kontra sa pagmina sa sentro sang Gonzaga. Gindsundan sini ang isa ka porum nga gintambungan sang masobra 400 personalidad.

**Balikatan Exercises, ginkastigo**

GINADUSO sang Bagong Alyansang Makabayan ang pagbasura sa nakatalana nga paglunsar sang Balikatan Exercises 2011 sa tunga sang mga suldado nga US kag mga pwersa sang Armed Forces of the Philippines.

Masobra 6,000 suldado nga US ang nakatalana nga magpasakop sa Balikatan Exercises sa maabot nga Abril 5-15. Himuon ini sa lain-lain nga lugar sang Central kag Southern Luzon.

Suno kay Renato Reyes Jr, pangkabilugan nga sekretaryo sang BAYAN, kinahanglan nga untaton sang gubyrno Aquino ang Balikatan Exercises 2011 agud hatagan-dalan anay ang pagrepaso sa Visiting Forces

Agreement (VFA). Ginaduso sang BAYAN ang pagbasura sang VFA nga ginagamit sang mga suldado nga Amerikano para makalusot sa paglapas sa mga layi sang pungsod. Paagi sa VFA, si Lance Corporal Daniel Smith nga napamatud-an naglugos kay Nicole sang 2005 sa Subic Bay Freeport nakalusot sa silot kag sa baylo ginpapauli sa US.

Kontra man ang BAYAN sa ginalunsar nga Balikatan Exercises

nga wala sang gintalana nga numero sang mga suldado nga nagasulod sa pungsod kag mga operasyon kombatan nga wala nahibal-an sang gubyrno. Mangin bubon man sang korapsyon ang Balikatan pareho sang mga anomalya nga nabuyagyag pareho sang pagpatuyang sa pondo nga ginagamit sa mga nagligad nga paghanas.

Abusuhon man sang VFA ang pagtener sang mga suldado nga US pareho sa ginahimo sini nga pagpabilin sa pila ka bahin sang Mindanao. Ini pamatuod sang paglapak sa soberanya sang pungsod, tumod pa ni Reyes.

Editorial

# Kundenahon ang imperyalista nga gerang agresyon sa Libya

**I**sa ka gerang agresyon batuk sa pungsod Libya ang ginlunsar sang mga imperyalistang gahum. Wala sang untat ang paglapak sa pungsodnon nga kahilwayan kag kinamatarung sang pumuluyo sang Libya nga magdesisyon sa ila kaugalingon sang ginhimo sang US, France, kag Britain kag iban pang pungsod ang pagpaulan sang mga bomba sa syudad sang Benghazi sining Marso 19 sa tuyo nga pukanon ang rehimen ni Moammar Gadaffi.

Ang pagpamomba ginhimo makaligad ipagwa sang UN Security Council ang resolusyon nga dumilian ang paglupad sa kahanginan sang Libya. Ginbalay ang amo nga resolusyon sa tuyo nga sablagan ang gubyernong Gadaffi nga lutuson ang armadong pag-alsa sang pila ka rebeldeng grupo nga suportado sang US.

Gin-umpisahan ang armadong pag-alsa nga ini sadtong katung-anan sang Pebrero. Sa suporta sang US, gintuyo nga sakyan sang mga armadong rebelde nga ini ang mga demokratikong aksyong protesta kag higante nga demonstrasyon sa North Africa kag Middle East kag mangsulsol sang mga kapareho nga pagbato sa Libya.

Makaligad ang pila ka simana, napaslawan ang mga ini nga suliton sa Libya ang mga higante nga demonstrasyon sadtong Enero kag Pebrero sa Egypt kag Tunisia nga nagpukan sa mga gubyerno diri. Sang ulihi, ang pagbato sa gubyernong G a d a f f i nalimite na sa pag-alsa sang magagmay nga grupo sang


mga armadong rebelde nga nangin mahapos nga target sang kontra-opensiba sang mga pwersa sang gubyerno ni Gadaffi.

Makaligad nga mapaattras ang mga armadong rebelde nga ini sa pila ka kuta sini sa Benghazi, nagdesisyon ang US kag mga imperyalistang pungsod nga direktang magpasilabot kag maglunsar sang gerang agresyon batuk sa Libya. Sa una nga hugnat sang imperyalista nga gerang agresyon, nagpaulan sang ginatos ka *missile* halin sa mga barko-de-gera nga nakaistasyon sa Mediteranean Sea kag nagpalupad sang mga *jet fighter* sa kahanginan sang Libya.

Madugay na nga gusto sang US nga pukanon ang gubyerno ni Gadaffi. Ang gubyerno nga ini isa sa pila ka gubyerno sa bug-os nga kalibutan nga nagatindog para sa pungsodnon nga kahilwayan kag nagabato sa imperyalistang polisiya sang globalisasyon nga neoliberal. Nagahiliusa ang mga imperyalista sa tuyo nga waskon ang pagginahum sang gubyernong Gadaffi. Tanan nga mga imperyalistang pungsod nagaisa kag nagasuporta sa gerang agresyon kag nag-amot sa armadong pagsalakay sa Libya.

Sa pihak nga bahin, ang paghiliusa sang mga imperyalista patimaan man sang wala sila sang pagsalig sa kada isa. Nagapauna-una ang mga imperyalistang kusog sa pagpwesto sang kaugalingon nila bilang impluwensyado nga gahum sa Libya pananglitan magmadinalag-on ang tuyo sang ila gerang agresyon nga pukanon ang gubyerno ni Gadaffi.

Ang paglunsar sang gerang agresyon sa Libya patimaan sang padayon nga nagalala nga krisis sang pangkalibutanon nga sistemang



**Mga tampok sa  
isyu nga ini...**

**Operation Odyssey  
Dawn** PAHINA 3

**Batuan ang rehimen  
US-Aquino** PAHINA 5

**Ika-100 Adlaw sg  
Kababaihan nga  
Anakpawis** PAHINA 10

## Mga tuntunin sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*